

Na osnovu člana 26. i 28. stav (3) Zakona o Vladi Kantona Sarajevo ("Službene novine Kantona Sarajevo", broj 36/14 - Novi prečišćeni tekst i 37/14 - Ispravka), člana 25. Zakona o ustanovama ("Službeni list RBiH", br. 6/92, 8/93 i 13/94) i člana 14. stav (4) Odluke o osnivanju Javne ustanove "Centar za napredne tehnologije u Sarajevu" ("Službene novine Kantona Sarajevo", br. 28/18 i 6/19), Vlada Kantona Sarajevo, na 54. sjednici održanoj 09.01.2020. godine, donijela je

**RJEŠENJE
O RAZRJEŠENJU VRŠILACA DUŽNOSTI
PREDSJEDNIKA I ČLANOVA UPRAVNOG ODBORA
JAVNE USTANOVE "CENTAR ZA NAPREDNE
TEHNOLOGIJE U SARAJEVU"**

I

Razrješavaju se vršioci dužnosti predsjednika i članova Upravnog odbora Javne ustanove "Centar za napredne tehnologije u Sarajevu", i to:

- Salko Polimac, dipl. pravnik, predsjednik,
- Arif Bektić, dipl. ecc., član,
- Neven Gafić, dipl. ing. maš., član.

II

Ovo Rješenje stupa na snagu danom donošenja i objavit će se u "Službenim novinama Kantona Sarajevo".

Broj 02-04-226-10/20

09. januara 2020. godine
Sarajevo

Po ovlaštenju Premijera
Amel Kovačević, s. r.

Ministarstvo privrede Kantona Sarajevo

Na osnovu člana 70. Zakona o organizaciji organa uprave u Federaciji Bosne i Hercegovine ("Službene novine Federacije BiH", broj 35/05) i člana 61. stav (1) Zakona o namještenicima u organima državne službe u Federaciji Bosne i Hercegovine ("Službene novine Federacije BiH", broj 49/05), ministar Ministarstva privrede Kantona Sarajevo donosi

**RJEŠENJE
O IZMJENI RJEŠENJA O IMENOVANJU
PRVOSTEPENE DISCIPLINSKE KOMISIJE**

I

U Rješenju ministra Ministarstva privrede Kantona Sarajevo broj 07-01-34-27111/18 od 15.08.2018. godine ("Službene novine Kantona Sarajevo", broj 36/18) o imenovanju Prvostepene disciplinske komisije, koja vodi cjelokupan prvostepeni disciplinski postupak za namještenike Ministarstva privrede Kantona Sarajevo, u tački I podtačka 1. mijenja se i glasi:

"1. Nedžad Ćurovac, dipl. pravnik - predsjednik,".

II

Ovo rješenje stupa na snagu danom donošenja, a objavit će se u "Službenim novinama Kantona Sarajevo".

Broj 07-01-34-27111-1/18

19. decembra 2019. godine
Sarajevo

Ministar
Mr. sci. **Haris Bašić, s. r.**

**Ministarstvo za obrazovanje, nauku i mlade
Kantona Sarajevo**

Na osnovu člana 66. st. (1) i (2) Zakona o organizaciji organa uprave u Federaciji Bosne i Hercegovine ("Službene

novine Federacije BiH", broj 35/05) i člana 109. stav (1) tačka a) Zakona o srednjem obrazovanju ("Službene novine Kantona Sarajevo", br. 23/17 i 30/19), ministrica za obrazovanje, nauku i mlade Kantona Sarajevo donosi

**PRAVILNIK
O NEOPRAVDANOM IZOSTAJANJU S NASTAVE**

Član 1.

(Predmet pravilnika)

Ovim pravilnikom propisuju se uslovi pod kojim se iskazuju neopravdani izostanci učenicima srednjih škola u Kantonu Sarajevo, te utvrđuje obim neopravdanih izostanaka za izricanje odgovarajućih odgojno-disciplinskih mjera.

Član 2.

(Svrha iskazivanja neopravdanih izostanaka)

- (1) Svrha iskazivanja neopravdanih izostanaka je da podstakne učenike na odustajanje od neprihvatljivih oblika ponašanja, a u skladu sa pravilima škole i kućnim redom.
- (2) Cilj je ujednačavanje kriterija, kontinuirano i sistematično praćenje i dosljedno pravdanje izostanaka.

Član 3.

(Opravdani i neopravdani izostanci s nastave)

- (1) Neopravdanim izostankom se smatra izostanak za koji razredniku nije dostavljena ispričnica/ljekarsko uvjerenje, koje je potpisao ili lično predao roditelj/staratelj učenika.
- (2) Neopravdanim izostankom se smatra izostanak sa nastave za koji roditelj nije unaprijed tražio i dobio odobrenje i to:
 - a) u hitnim slučajevima usmeno od razrednika/nastavnika sa njegovog časa,
 - b) pismeno od razrednika za izostanak do tri radna dana, direktora škole za izostanak do pet radnih dana i nastavničkog vijeća za izostanak do 15 radnih dana.
- (3) Kada se prijevoznik ne pridržava reda vožnje, kod zastoja u saobraćaju ili u drugim sličnim situacijama, izostanci se pravdaju po nalogu direktora.
- (4) Opravdanim izostankom smatra se prisustvovanje smotrama i manifestacijama u okviru kulturne i javne djelatnosti škole.
- (5) Tokom školske godine roditelj/staratelj može lično opravdati izostanak svog djeteta za koji nije dostavljena ispričnica/ljekarsko uvjerenje, u trajanju od najviše dva dana u toku jednog polugodišta, odnosno četiri dana u toku nastavne godine.
- (6) Načini opravdavanja izostanaka učenika, rokovi za dostavljanje ispričnice/ljekarskog uvjerenja, kao i rok javljanja o razlogu izostanka učenika, uređuju se pravilima škole.

Član 4.

(Specifični izostanci)

- (1) Sve izostanke, osim bolesti učenika, roditelj mora najaviti unaprijed i pismeno zatražiti odobrenje.
- (2) Učenik može izostati s nastave uz odobrenje:
 - a) nastavnika sa njegovog nastavnog časa (u hitnim slučajevima uz prethodno ostvareni kontakt s roditeljima, ukoliko se ne može kontaktirati razrednik),
 - b) razrednika (do tri radna dana),
 - c) nastavničkog vijeća (do 15 radnih dana).

Član 5.

(Odlazak na specijalistički ljekarski pregled)

Učenik koji ima dogovoren specijalistički ljekarski pregled dužan je izostanak unaprijed najaviti razredniku i

priložiti ljekarsko opravdanje ili uputnicu nakon obavljenog pregleda.

Član 6.

(Nepredviđene situacije i načini izostajanja)

Na prijedlog odjeljnog vijeća nastavničko vijeće će odlučivati o svakom slučaju pojedinačno i donijeti odgovarajuću odluku u situacijama koje nisu predviđene ovim pravilnikom, a koje prouzrokuju izostanak učenika sa nastave.

Član 7.

(Izricanje odgojno-disciplinskih mjera za neopravdane izostanke)

- (1) Mjere za teže povrede učeničke dužnosti se izriču u skladu sa članom 109. stav (2) Zakona o srednjem obrazovanju ("Službene novine Kantona Sarajevo", br. 23/17 i 30/19).
- (2) Odgovarajuća odgojno-disciplinska mjera se izriče učeniku i zbog neopravdanih izostanaka s nastave u skladu sa članom 8. ovog pravilnika.
- (3) Neopravdano izostajanje sa nastave spada u teže povrede učeničke dužnosti.

Član 8.

(Utvrđivanje obima neopravdanih izostanaka sa nastave)

- (1) Utvrđuje se obim neopravdanih izostanaka sa nastave za izricanje odgojno-disciplinskih mjera.
- (2) Učeniku koji neopravdano izostane sa nastave izriče se odgovarajuća odgojno-disciplinska mjera, koja za sobom povlači snižavanje ocjena iz vladanja učenika, i to:
 - a) od 0 do 5 neopravdanih časova - vladanje primjerno,
 - b) od 6 do 10 neopravdanih časova izriče se ukor razrednika - vladanje vrlo dobro,
 - c) od 11 do 19 neopravdanih časova izriče se ukor odjeljnog vijeća - vladanje dobro,
 - d) od 20 do 26 neopravdanih časova izriče se ukor direktora - vladanje zadovoljava,
 - e) od 26 do 30 neopravdanih časova izriče se ukor Nastavničkog vijeća - vladanje loše,
 - f) 31 i više neopravdanih izostanaka - isključenje iz škole.

Član 9.

(Prelazne odredbe)

Škola je dužna svoja opća akta uskladiti sa ovim pravilnikom u roku od 60 dana od njegovog stupanja na snagu.

Član 10.

(Obaveze razrednika)

Na početku svake školske godine, razrednik je dužan na času odjeljnog zajednice izvijestiti učenike, a na roditeljskom sastanku roditelje/staratelje učenika, o sadržaju ovog pravilnika.

Član 11.

(Nadzor)

- (1) Nadzor nad provođenjem ovog pravilnika vrši Ministarstvo za obrazovanje, nauku i mlade Kantona Sarajevo.
- (2) Inspekcijski nadzor nad provođenjem ovog pravilnika vrši Kantonalna uprava za inspekcijske poslove.

Član 12.

(Stupanje na snagu i primjena)

Ovaj pravilnik stupa na snagu osmog dana od dana objavljivanja u "Službenim novinama Kantona Sarajevo", a primjenjivaće se od školske 2020/2021. godine.

Broj 11/04-38-37994-1/19

5. decembra 2019. godine

Sarajevo

Ministrica

Mr. Zineta Bogunić, s. r.

Ministarstvo unutrašnjih poslova Kantona Sarajevo

Na osnovu čl. 21. stav (5) tačka a) i 23. stav (3) tačka d) Zakona o unutrašnjim poslovima Kantona Sarajevo ("Službene novine Kantona Sarajevo", br. 1/16, 26/19 i 31/19) i čl. 127. stav (1) tačka b), a u vezi sa članom 6. Zakona o policijskim službenicima Kantona Sarajevo ("Službene novine Kantona Sarajevo", br. 38/18 i 26/19), na prijedlog policijskog komesara, ministar unutrašnjih poslova Kantona Sarajevo donosi

PRAVILNIK

O NAČINU DRŽANJA I NOŠENJA ORUŽJA I MUNICIJE, VRSTAMA NAORUŽANJA I MUNICIJE, OPREME I POSEBNE OPREME POLICIJSKIH SLUŽBENIKA UPRAVE POLICIJE MINISTARSTVA UNUTRAŠNJIH POSLOVA KANTONA SARAJEVO

DIO PRVI - OPĆE ODREDBE

Član 1.

(Predmet)

- (1) Ovim pravilnikom utvrđuju se definicije, značenje pojedinih izraza, način držanja i nošenja oružja i municije, nabavka, prijem, zaduženje, popis, skladištenje, evidencije, održavanje, inspekcija i vrste naoružanja i municije, opreme i posebne opreme policijskih službenika koje se koristi od strane Uprave policije Ministarstva unutrašnjih poslova Kantona Sarajevo (u daljnjem tekstu: Uprava policije) prilikom vršenja poslova i zadataka u skladu sa Zakonom o policijskim službenicima Kantona Sarajevo ("Službene novine Kantona Sarajevo", br. 38/18 i 26/19) (u daljnjem tekstu: Zakon) i drugim zakonskim i podzakonskim aktima.
- (2) Ovim pravilnikom se u Upravi policije za sve policijske službenike, propisuju procedure koje će se primjenjivati prilikom korištenja i rukovanja oružjem na dužnosti i van dužnosti.

Član 2.

(Značenje izraza)

Pojedini izrazi upotrijebljeni u ovom pravilniku imaju sljedeće značenje:

- a) oružje je vatreno oružje, vazdušno oružje, rasprskavajuće, gasno i hladno oružje.
- b) vatreno oružje su sve vrste pušaka, pištolja i revolvera, kao i sve vrste naprava koje pod pritiskom barutnih gasova izbacuju kroz cijev zrno, kuglu ili sačmu,
- c) puška je vrsta dugocijevnog oružja koja ima mogućnost intenzivnijeg ispaljivanja municije, veću brzinu pucanja i preciznost pogodaka. Puške sa kapacitetom magazina većim od 9 metaka sa poluautomatskim ili automatskim mogućnostima se klasificiraju kao vojno oružje. Puška može biti opremljena optičkim uređajima za dnevno i noćno nišanje i gađanje, te sredstvima za prigušivanje zvuka i plamena,
- d) automatska puška je puška koja se nakon opaljenja automatski napuni i koja može ispaliti više od jednog metka jednokratnim pritiskanjem okidača. U ovu grupu spadaju i automatski pištolji bez obzira na dužinu cijevi. Automatska puška i automatski pištolji mogu biti opremljeni optičkim uređajima za dnevno i noćno nišanje i gađanje, te sredstvima za prigušivanje zvuka i plamena,